

華嚴發願文 北宋 守遂法師

歸敬偈語

稽首華嚴真性海 種種光明遍照尊 普賢萬行所莊嚴 一切真如法界藏
龍樹龍宮親誦憶 實叉于闐闐微言 一乘圓頓妙法門 見性成佛真秘典
手捧目觀心口誦 當知宿有大因緣 見聞隨喜發菩提 究竟圓成薩婆若

禮讚大經

南無毗盧教主 華藏慈尊 演寶偈之金文 布琅函之玉軸 塵塵混入 剎剎圓融
十兆九萬五千四十八字 一乘圓教 大方廣佛華嚴經
若人欲了知 三世一切佛 應觀法界性 一切唯心造

供養發願

常願供養恭敬 七處九會佛菩薩 常願證入常宣說 五周四分華嚴經
常願供養無休歇 九十剎塵菩薩眾 常願悟入常宣說 大方廣佛華嚴經

正願發文

伏願弟子 真慧隆真 生生世世 盡過去際 盡現在際 盡未來際 在在處處
眼中常聞 如是經典 耳中常聞 如是經典 口中常誦 如是經典
手中常書 如是經典 心中常悟 如是經典 身常普行 如是經典
願常宏揚 如是經典 願常宣說 如是經典

願學聖賢

願生生世世 盡過去際 盡現在際 盡未來際 在在處處
常得親近華藏一切聖賢 常蒙華藏一切聖賢慈悲攝受 如經所說願悉證明
願如善財菩薩 願如文殊師利菩薩 願如彌勒菩薩 願如普賢菩薩
願如觀世音菩薩 願如毗盧遮那佛

總迴向文

以此稱經功德 以此發願功德
願與四恩三有 法界一切眾生 消無始以來 盡法界 虛空界 無量罪垢
願與四恩三有 法界一切眾生 解無始以來 盡法界 虛空界 無量冤業
願以四恩三有 法界一切眾生 集無始以來 盡法界 虛空界 無量福智
同遊華藏莊嚴海 共入菩提大道場